



Inuit Pisinnaatitaaffiit Kalaallit Nunaata Siunnersuisoqatigiivi  
Grønlands Råd for Menneskerettigheder

Nuuk, 31.3.2020

Asasavut Inatsisartunut ilaasortat

Neriuppugut nunatsinnut nunarsuatsinnullu annilaarnaqisumik nappaalanersuaqarnerani tamassi peqqillusilu ajunngitsusi.

Piffimmi imaannaangeqisumi nunatsinni oqartussat ajunngitsorujussuarmik ingerlatsinerat siullermik oqaatigerusupparput minnerunngitsumillu Tunillaassortunik Nappaalanersuaqarneranut Ataatsimiititaliarsuup, Nunatta Nakorsaaneqarfiata Naalakkersuisullu nappaalanersuaqarnerani nunatsinnilu tunillaassuuttoqarsinnaanerani suliaat nersualaarumavagut.

Inuit Pisinnaatitaaffii pillugit Siunnersuisoqatigiit Inuit Pisinnaatitaaffii pillugit Siunnersuisoqatigiit pillugit Inatsisartut inatsisaat nr. 20, 27. november 2018-imeersoq tunngavigalugu sulivugut ilaatigullu inuit pisinnaatitaaffii pillugit Inatsisartunik, Naalakkersuisunik oqartussaasunillu allanik aamma namminersorlutik suliaqartunik siunnersuinerit suliassaarput.

Nappaatit tunillaassortut akiorniarlugit iliuutsit pillugit Inatsisartut peqqussutaata allanngortinneqarnera pillugu Inatsisartut inatsisissaat nr. xx, xx.xxx-imeersup tuaviuussamik suliarineqarnerani inatsisartunilu aalajangiiffigineqartussanngornerani tusagassiortunit inatsissatut siunnersuut qanoq isumaqarfigineripput pillugu oqaaseqaqquneqarsimavugut.

Inatsisissatut siunnersuut uatsinnut tusarniutigineqarsimanngilaq.

Arlalialunnilli tusagassiorfitsigut aamma oqaatigisimasatsinnik immikkut maluginiagaqarpugut taakkualu ilissinnut toqqaannartumik matumuuna apuukkumavagut.

Tunngaviatigut innuttaasut peqqissusaannik inuunermullu pisinnaatitaaffeqarnerannik illersuianeq paasilluinnarparput.

Pisumili ima ittumi siunnersuisoqatigiinni suliassatut isigaarput sukateriniarnerit pineqartut amerlasuutigut innuttaasut pisinnaatitaafferisaannik annikillisaanerannik eqqaatitsissalluta, pisinnaatitaaffiillu taakkua ulluinnarni pissutsit naliginnaasuutillugit annikillisarneqanngisaannartassammata. Tamatumani assersuutigalugu nikerarsinnaanermut kiffaangissuseqarneq katersuussinnaanermullu pisinnaatitaaffeqarneq pineqarput.

Maluginiarparput inatsit pineqartoq aqqutigalugu annertuunik pisinnaatitsissutiniq eqqussiniartoqartoq, tunngaviusumillu inuit pisinnaatitaaffii eqqarsaatigalugit innersuussutigiumavarput sukaterinerit peqqissutsimut ilisimatuussutsikkut tunngaveqartuassasut.

Ilanngullugu kaammattuutigissavarput inatsisitigut pisinnaatitsissutit aalajangiunneqartut erseqqilluinnartuussasut, innuttaasut pisortallu, soorlu politiit, inatsit qanoq paasisaasnersoq nalornissutigingisaannarniassammassuk.

Aamma erseqqissumik kaammattuutigiumavarput sukaterinerit peqqissutsimut ilisimatuussutsikkut illersorneqarsinnaasumik atorunnaarsinneqarsinnaanngorpata ingerlaannaq atorunnaarsinneqassasut, kingusinnerusukkut aatsaat atorunnaarsinnagit.

Inatsisissatut siunnersuummi § 6, imm. 2 inigisamut eqqartuussivikkut aalajangiineqanngikkaluartoq isertertoqarsinnaaneranik oqaasertaliussat pisinnaatitsisinnaanerattut paasivagut. Inigisap ajortumiitsaaliugassaalluinnarnera Inatsisini tunngaviusuni § 72-imi illersugaavoq. Taamaammat ippinnartoqartipparput pisinnaatitsissut taannarpiaq inatsisissatut siunnersuummut nassiutiaatini naliginnaasuni siunnersuummi immikkoortut pingaarnertit allattorsimaffianni ilaangimmat.

Aalajangersagariniakkap taassuma mianersortumik suliaqarfiginissaa kaammattuutigaarput aalajangersakkallu tamarmik qanorpiaq kinguneqarsinnaassanersut inuiaqatigiinni kikkunnit tamanit paasinartunngorlugit suliarineqassasut kaammattuutigaarput, aamma kingusinnerusukkut nalunaarutiniq suliaqartoqarpat.

Ikinngutinnersumik inuulluaqqusillunga



Sara Olsvig

Siulittaasoq, Inuit Pisinnaatitaaffii pillugit Siunnersuisoqatigiit